



Omer Hamzić

Gračanički sportisti dobili krov nad glavom

(Povodom izgradnje i puštanja u rad prve sportske dvorane u Gračanici)

Sportska sala – velika radost za Gračanicu

Prva utakmica u novoizgrađenoj sportskoj dvorani u naselju Luke u neposrednoj blizini Druge osnovne škole odigrana je 28. oktobra 2001. godine. Svečanost puštanja u upotrebu tog objekta, uz brojne zvanice i visoke goste, obavljena je 9. novembra 2001. godine. Gračanica je dobila fiskulturnu salu standardnih dimenzija: 60x31 metra sa svim pratećim sadržajima (četiri svlačionice, ofis, kafeterija, mokri čvorovi, ostava za rekvizite, vlastita kotlovnica). Može primiti više od 1000 posjetilaca.

Od ideje do realizacije ovog projekta nije prošlo više od šest mjeseci. U plan se ušlo sa 1.438.000 KM, potrošeno 1.398.000 KM. Gradnja je trajala svega 3,5 mjeseca. Nosilac posla i najveći ulagač: Građevinska kompanija «Širbegović» Gračanica.


«Zahvaljujem se svima vama što ste došli da podijelite ovu veliku radost s Gračanicom. Danas na simboličan način puštamo u upotrebu Sportsku dvoranu, koju su isuviše dugo priželjkivale generacije i generacije mladih Gračanlija, vrijednih sportista i sportskih radnika ove općine i ovoga grada. Mi danas gračaničkom sportu, evo, najzad darujemo krov nad glavom. Ovdje i sada prisustvujemo otvaranju nove stranice u istoriji gračaničkog sporta i pomjeramo granice društvenog standarda u ovome gradu. Na

Omer Hamzić
Gračanički sportisti dobili krov
nad glavom

Edin Šaković
Stećci u okolini Gračanice

Fikret Ahmedbašić
Familije useljene u Džakule u periodu od
1930. do 2000. godine

Omer Hamzić
Likovi zavičaja: Faruk Mujić



Sportska sala Gračanica

sadašnjim i budućim generacijama je da iskoriste ove uslove i da postižu još bolje rezultate», rekao je u svom kraćem obraćanju prilikom otvaranja sportske dvorane poznati sportski radnik i aktuelni načelnik Općine Gračanica Nusret Helić, koji je zajedno sa Čamilom Naimkadićem, jednim od najuspješnijih predsjednika u istoriji opštine Gračanica, obavio simbolično presijecanje vrpce i predao objekat sportskoj Gračanici. Tako je označen završetak jedne od najvećih investicija u društveni standard poslijeratne Gračanice. Sportska sala postaje značajan faktor u javnom i sportsko-kulturnom životu Gračanice.

Sve pohvale na ceremoniji otvaranja upućene su Kompaniji «Širbegović», koja je dala svoj najveći doprinos da se taj, za Gračanicu izuzetno značajan posao uspješno završi. Nije slučajno što je ovom prilikom izvršena i promocija Certifikata «Iso standard 9001», koji je Kompanija «Širbegović» osvojila još u aprilu ove godine.

Sportska sala – kuća gračaničkog sporta

Za dosadašnje uspjehe gračaničkog sporta zaslužni su mnogi sportisti i sportski radnici. Godinama i decenijama radili su i trenirali u tuđim ili skućenim prostorima, ali sa mnogo odricanja, entuzijazma i ljubavi. I u tako nepovoljnim uslovima postizali su vrhunske rezultate i čuvali visok renome sportske Gračanice.

Danas u gradu djeluje 9 sportskih klubova koji okupljaju oko 1.500 aktivnih sportista. Skoro isto toliko ima aktivnih sportista, klubova i društava u ostalim mjesnim zajednicama na općini. Više njih plasiralo se na visoka mjesta u raznim našim takmičarskim rangovima iako su trenirali i sve utakmice igrali na tuđem terenu, u drugim gradovima koji imaju sportske dvorane. Tek nakon izgradnje i puštanja u rad ovog objekta oni će biti «svoji na svome», tek od sada mogu se očekivati njihovi pravi rezultati. Nema sumnje, ovaj «poklon» davno su zaslužili: Rukometni klub «Gračanica-indeks», pr-

vak države u rukometu, Malonogometni klub «Kaskada», državni prvak u malom nogometu, Ženski odbojkaški klub «Gračanica», čiji su pioniri osvojili naslov prvaka Federacije BiH u odbojci kao i ostalih 13 sportskih klubova koji takođe postižu zapažene rezultate u svim rangovima takmičenja kod nas. Malonogometni klub «Kaskada» nedavno se na kvalifikacionom turniru Kupa evropskih šampiona u Rotterdamu plasirao među osam najboljih evropskih ekipa i na najbolji način prezentirao gračanički i bosanskohercegovački mali nogomet.

Osim takmičarskog sporta, bez odgovarajuće fiskulturne dvorane nije bilo moguće razvijati ni takozvane masovne sportove, odnosno sportsku rekreaciju omladine i građana u najširem smislu te riječi. Činjenica je da za takvim vidovima takozvanog aktivnog odmora postoji veliki interes u općini i kod stanovništva različitih dobi.

Zbog nedostatka adekvatnog prostora u Gračanici se nisu mogle organizovati, ne samo sportske, već ni masovnije kulturno-zabavne priredbe i manifestacije komercijalnog karaktera kao što su privredne izložbe, festivali, popularni koncerti itd.

Sportska sala – od ideje do realizacije

Inicijativa za izgradnju sportske sale na lokaciji Luke, u neposrednoj blizini Druge osnovne škole potekla je početkom marta ove godine od prvog čovjeka gračaničke Kompanije «Širbegović», inženjera Faruka Širbegovića, koji je odlučio da realizuje ovu investiciju ne oslanjajući se ni na kakve državne i druge donacije i sponzorstva, već je okupio zainteresovane subjekte i dioničare, koji su bili spremni da se uključe u projekat. Sportska javnost Gračanice tu je inicijativu jedva dočekala. Na podršku ostalih zainteresovanih subjekata, prije svih, sportskih

klubova, Vijeća Mjesne zajednice Gračanica i Druge osnovne škole nije se dugo čekalo. Na sjednici održanoj 26. aprila 2001. godine, Općinsko vijeće Gračanica daje podršku projektu i prihvata koncept njegovog finansiranja na principu zajedničkih ulaganja. Nakon toga, pristupilo se konkretnim aktivnostima na realizaciji projekta.

Projektom je predviđeno finansiranje izgradnje objekta na principu zajedničkih ulaganja Kompanije «Širbegović», Općine Gračanica i nekoliko gračaničkih privatnih firmi. Na tom principu formirana je Skupština dioničara, odnosno ulagača, a potom izvršena registracija firme pod nazivom DOO «Sportska sala» Gračanica sa zadatkom da vodi dalje aktivnosti na izgradnji objekta. Nakon toga potpisan je protokol između DOO «Sportska sala», Kompanije «Širbegović» i Općine Gračanica, kojim su regulisani međusobni zadaci i obaveze do konačne realizacije projekta.

U posao se krenulo pod geslom: «Sportska dvorana – odmah i sada». Gradnja sa svim procedurama nije smjela trajati duže od šest mjeseci. Sve se odvijalo po utvrđenoj dinamici. Objekat je faktički predat gradu na upotrebu i upravljanje prije utvrđenog roka. U prvom planu ovog puta nije bio profit i zarada. Najveći profit iz jednog ovakvog posla je zapravo kvalitetno korišćenje slobodnog vremena ovdašnje omladine i viši nivo kvaliteta življenja u ovome gradu.

Sportska sala - novi i stari rezoni

U prošlosti je bilo više pokušaja da se riješi pitanje sportske dvorane u ovom gradu. Ostajala je, međutim na čekanju nekih boljih vremena – nekad opravdano, nekad neopravdano. Iako su takozvani odgovorni faktori bili svjesni da bez ovakvog objekta Gračanica nije nikad mogla biti prava čaršija, uvijek je nešto bilo preče.

Poučeni tim iskustvima, shvatajući da ne dolaze bolja, već nova vremena, ovoga puta odbacili su nerealne ambicije i megalomanske projekte iz prošlosti, ali i zablude da će se ovakvi i slični objekti graditi iz nekih državnih trezora i potpora. Ovaj projekat realizovan je na sasvim novim principima - rentabilnog ulaganja dioničara i ekonomske samoodrživosti izgrađenog objekta. To je, zapravo, formula novog doba u koje smo već zakoračili. I ovoga puta došla je do punog izražaja tradicionalna poslovnost i poduzetnički duh po kojem je Gračanica davno postala prepoznatljiva u svom širem okruženju.

Izgradnjom ovog, može se reći, eminentno gradskog objekta poslovni ljudi koji su osmislili i realizovali čitav projekat dokazali su da se i u nepovoljnom ambijentu za investicije, sa relativno malo sredstava za kratko vrijeme mogu rješavati mnoga goruća pitanja našeg društvenog standarda, ne samo na lokalnom, već i na širem prostoru. Može biti dobar primjer i model za rješavanje raznih komunalnih problema na principu čistih računa i samofin-

ansiranja ovakvih i sličnih objekata. Na tom principu bit će uspostavljeno i redovno finansiranje, odnosno redovna djelatnost ovog objekta. Redovno finansiranje planirano je iz sljedećih izvora: sportski klubovi koji su na općinskom budžetu, kulturne manifestacije i priredbe, komercijalne manifestacije, reklame, kafeterija, prodavnica, organizovanje rekreacije (fitnes sala, stoni tenis i sl.)

Sve, dakle, na ekonomskom rezonu. U vremenu koje dolazi, drugačije se, jednostavno, neće moći.

Započeta gradnja (prije četiri godine) ogromnog objekta Privredno-kulturno-sportskog centra (gradske sportske dvorane) na Bazenu u Gračanici velika je pouka i činjenica od koje danas «boli glava». Preveliki je to, očigledno, zalogaj i za mnogo jače čaršije od Gračanice. Aktuelno općinsko rukovodstvo moralo se opredijeliti između čekanja nekih boljih vremena za nastavak gradnje tog objekta i podrške projektu kojim za kratko vrijeme i sa daleko manjim ulaganjima skida sa dnevnog reda pitanje sportske dvorane u gradu. Između prevelikih želja i mogućnosti odabrano je realno rješenje koje je pretočeno u akciju. Vrijeme je pokazalo da to nije bila pogrešna odluka. O daljoj sudbini Privredno-kulturno-sportskog centra bit će još dosta priče. Od stručnih ljudi očekuje se da ponude odgovarajuća rješenja, od aktuelne vlasti da donese odgovarajuće odluke. Ni jednim ni drugim neće biti lahko.

Srećom, to se više ne tiče gračanickog sporta. On već ima svoju kuću i «krov nad glavom».

Spisak ulagača i struktura ulaganja dioničkog kapitala u DOO «Sportska sala» Gračanica

Ulagači	Iznos	%
Kompanija «Širbegović»	654.000	46,98
Općina Gračanica uz učešće TK od 100.000 KM	486.000	34,91
Druga osnovna škola	76.000	5,46
«Grin» Gračanica	38.000	2,73
«Gramat» Gračanica	12.000	0,86
«Kamarić» Gračanica	12.000	0,86
«Zim plast» Gračanica	12.000	0,86
«Limorad» Gračanica	12.000	0,86
«Monter» Gračanica	12.000	0,86
«Džada» Gračanica	34.000	2,44
«Asfalt» Sarajevo	12.000	0,86
«Klaus Lehman» Gračanica	12.000	0,86
Intas GmbH	8.000	0,57
«Cjevomont»	12.000	0,86
Ukupni ulozi	1.392.000	100

Napomena: cijena koštanja objekta sa pripadajućim zemljištem, priključcima, projektnom dokumentacijom, uključujući nadzor i rentu iznosi 1.392.000 KM; vrijednost 1 dionice je 2.000 KM